



## HINI NGA ISYU

- ★ SOBRA USA KA MILYON  
NAGPROTESTA
- ★ 35 PISOS NA AN BALOR  
HAN DOLYAR
- ★ KAPITAN HAN 19<sup>TH</sup> IB PA  
GINSIRUTAN HAN NPA
- ★ PNP DETATSMEN  
GINRONDA

LARAB 2

## EDITORIAL

### U.S. IMPERYALISMO, NAGRUBA EKONOMIYA HAN NASUD

An ekonomiya han nasud Pilipinas gintalaan han dominasyon han U.S. imperyalismo tikang pa han panahon 1898 han mabiktima an Pilipinas han iya kolonyalista nga pananakop.

An pagkapirdi han rebolusyon Pilipino hadton 1896 ngan an direkta nga pagsakop han kolonyalista nga U.S. ha Pilipinas nagresulta han pagdominar han monopolyo kapitalismo nga U.S. ha dinhianaon nga pyudalismo. Tikang dinhi, nahigtan na an aton ekonomiya ha pangkalibutan nga sistema nga kapitalista. Tungod hini, nahurma an baga-pyudal nga ekonomiya nga prinsipal nasarig ha paniniyupi ha mga parag-uma, monopolyo ha tuna, ngan pakignegosyo ha imperyalista nga mga nasud nga nagkontrol ha bug-os nga ekonomiya.

Otro nga gintukod ngan dugang nga ginpadig-on an baga-pyudal nga ekonomiya ha pagbalik han U.S. ha Pilipinas kahuman han Ikaduha nga Gerra nga Pangkalibutan hadton 1945. Kabalyo han paghatag hin buwa nga independensya hadton 1946, ginpabilin han U.S. an dire direkta nga dominasyon hini ha nasud pinaagi han pagpapagrabe han kolonyal nga kinaiya han negosyo nga naeksister na gidaan hadto pa ha ilarum han direkta nga kolonyal nga paghahadi.

*padayon ha luyo nga paypay*

Septiyembre-Oktubre 1997

Tikang 1946, waray umuswag, lugod deruderetso nga nagtikagrabe an krisis panekonomiya han nasud. An pagbutho ah pasista nga diktadurya nga Marcos hadton 1972 nagsenyal han pagtungtong han krisis ha terminal nga balitang. Ngan tikang ha panahon ni Marcos, ginpas-an na han sumunod nga mga rehimen tikang kan Aquino ngada yana kan Ramos, an nagtikagrabe nga krisis ha ekonomiya han nasud.

Klaro an importante nga mga pangilal-an han padayon nga pagruydoy han ekonomiya han nasud Pilipinas. Nagtikalubong an aton nasud ha utang ha langyaw diin maabot na ini yana ha 41 bilyon dolyar. An balor han piso madagmit nga naghahabubo diin inabot na hin 35 pisos an kabalyo han usa nga dolyar. An alkanse ha langyaw nga negosyuhay inabot na ha 3.6 bilyon dolyar tikang ha 858 milyon dolyar hadton 1992. Padayon nga nadudugngan an porsyento han waray trabaho, samtang madagmit nga nagtitikahitaas an presyo han mga batakan nga papliton. Padayon nga nagluluros an balitang han pakabuhi han mga Pilipino. Ha kamatuuran, maabot na ha 75% han populasyon an nalulubong ha kakurian.

Mentras nga nagpapabilin an kontrol han U.S. imperyalismo ha ekonomiya han nasud, diri makakahaw-as an katawhan Pilipino ha tikagrabe nga krisis pan-ekonomiya. Mentras aada an ekonomiya nga nasarig ha pag-eksport hin produkto nga dependente ha import hin hilaw ngan human na nga produkto; mentras aada pa an ekonomiya nga nasarig ha dayuhan nga puhunan ngan turismo; ekonomiya nga nasarig ha dayuhan nga pautang, ngan ekonomiya nga diri industriyalisado, agraryo ngan atrasado, magtitikalubong la ha kumunoy han pan-ekonomiya nga krisis an aton nasud.

An tinuod la nga nasudnon nga industriyalisasyon ngan tinuod nga reporma ha tuna nga nasubay ha linya han nasudnon demokratiko nga rebolusyon an amo la nga paagi nga magsosolbar han prpoblema han eknomiya han aton nasud. Ini an mag-uutod han dominasyon han U.S. iumperyalismo ha ekonomiya han Pilipinas ngan magduduso han tinuod nga pag-uswag han panekonomiya nga kinabuhi han katawhan Pilipino! ★

surat HAN mambarasa

Mga kasama ha Larab,

Usa nga mapaso nga pangumusta ngan mabuhay kamo ngatanan. Dako gud man an nahibulig ha otro nga pagpaparayhak han paggamit han V-Type para ha rebproduksyon han Larab. Maupay gihapon nga an iyo naipapadara kinat na gidaan nga kopya han istensil han Larab. Tungod hini kami na la an nagbubuot kon pira nga kopya an amon ipapagawas. Yana nga nag-hiluag na an amon ekspansyon han buruhaton masa masayon na liwat namon nga nailalanat an kinahanglanon nga kopya han Larab. An usa la nga problema namon kay diri pa kami mga batid kaupay ha paggamit han V-Type. May mga eksperyensya kami nga dagmit nga nagigisi an istensil bisan kon pira pa la nga kopya an amon nahihimo. Ano daw la an iyo mahisasagdon hini?

Tagsurat,  
kas. Ani

*Kasamang Ani ngan iba pa nga mga kasama,*  
*Ungod la nga dako gud an bulig han V-type ha aton buruhaton nga reproduksyon. Hinaut unta nga magpadayon na ini nga praktis ngan padayon pa nga umusyag an aton kahiaraan ha paggamit hini. An usa nga hinungdan han madagmit nga kagisi han istensil kon diri ini maupay nga nakataud o nakadukot ha V-Type. An usa pa kon masyado makusog an pagbagnos han iskwidye. Maupay nga gamiton an roller han hibang na nga typewrier komo saliwang han iskwidyi.. Pero kon waray hini poyde ipadayon an iskwidyi basta kontrolado la an kusog han pagbagnus hini. Gin-aadman liwat namon an pagkontrol han pag-cut han stencil nga malikyan an sobra nga pagkaluho han stencil labi na ha mga drowing.*

*O sige, dinhi na la anay tubtob. Tatalinguhaon na la namon nga makapagpasaro pa hin mag-upay nga eksperyensya ha maupay nga paggamit han V-Type. Salamat ha iyo surat.*

*Larab Istap*

## **SOBRA USA KA MILYON NAGPRO-TESTA KONTRA HA CHA-CHA**

Naglansar hin rali-demonstrasyon an sobra usa ka milyon nga katawhan hadton Septyembre 21, kaadlawan han ika-25 anibersasryo han paglansar han Martial Law, komo pagprotesta kontra han plano han rehimen ni Ramos nga amyendahan an bataan balaud han Pilipinas antes pa matapos an iya pangatungdanan. Mayorya han katawhan an natipa han CHA-CHA tungod kay magpapahilawig ini ha termino ni Ramos ngan masingadto ha pagtamak ha sibil ngan pampulitika nga katungod han katawhan ngan ha pagbaligya han karikuhan han nasud ngadto ha mga langyaw nga monopolyo kapitalista.

An bug-os nga nasud an nagprotesta. Ha Davao, maabot hin 100,000 an nagrali ngan 20,000 ha Cagayan de Oro. Inabot naman ha 10,000 an nagrali ha Iligan City. Ha Cebu inabot hin 150,000 an mobilisasyon samtang ha Bacolod inabot hin 100,000. Ha Ilocos Sur inabot naman hin 10,000 an nagrali ngan pareho gihapon nga ihap an didto ha Tuguegarao Cagayan. Ha Laoag City inabot naman an mobilisasyon ha 5,000 ngan yukot-yukot liwat an inupod ha Angeles Pampanga. Mayda liwat nahimo nga mga aksyon protesta ha mga tersaryo nga mga syudad han nasud sugad han Tacloban ngan iba pa.

Ha Manila an may pinakadako nga mobilisasyon diin maabot 600,00 ngada 750,000 an gintatantiya nga inupod ha aksyon protesta. Napuno han yukot-yukot nga katawhan an Rizal Park ha Luneta tikang ha magkadarudilain nga klase ngan sektor ngan tikang ha magkadaudilain nga kolor pampulitika nga nagkaurusa ha pagtipa ha CHA-CHA. An pinakamilitante nga grupo amo adton ginpamunuan han KMU ngan BAYAN.

Kahuman han aktibidades ha Rizal Park, an grupo han KMU-BAYAN nga gintantiya nga maabot 20,000 nagmartsa ngadto ha Mendiola atubangan han Palasyo Malakanyang. Nagpartisipar hini nga Martsa an sikat nga artista ngan singer nga hi Nora Aunor ug nanawagan hiya nga ipadayon an pakig-away han katawhan kontra ha pasista nga larang han US-Ramos nga rehimen. Nagkamayda hin mga pankultura nga pasalida an mga nagrali labot la han mga pamulong han mga lider han demonstrador nga usa-usa nga nagturusok han karat-an han presente nga rehimen.. Nagpasalida hi Nora Aunor hin duha nga progresisbo nga kanta nga naghatag hin inspirasyon ha mga raliyesta. Mga banda alas siyeta na han gab-i nahuman an programa ngan mamingawon ngan organisasdo nga nagdispers an mga nagprotesa kahuman han madinaugon nga aksyon.

Klaro nga nagin madinaugon an nailansar nga aksyon protesta han katawhan apisar han mga panhulga nga ginbuhian han rehimen ha pangunguna ni Heneral Acedera. Usa na liwat ini nga makusog nga tampalo ha bayhon han rehimen ni Ramos nga nagmemenos han kakayahan han mga progresibo, patriotiko ngan militante nga sektor han katawhan nga kontrahon an iya kontra katawhan nga mga larang.

Kasumpay hini nga panhitabo, nanawagan hin Jose Maria Sison:“Pabor kaupay an obhetibo nga kundisyon para ha pagtubo ngan pagkusog ngan pag-bante han rebolusyonaryo nga pwersa. Angay himuon han mga namumuno nga proletaryo nga Partido han rebolusyon an pagpupursige nga marealisar an tukma nga pan-ideolohiya, pampulitika ngan pan-organisasyon nga linya han Partido. An haluag nga katawhan nadiri na ha naghahadi nga sistema ngan nag-uungara na hira hin rebolusyonaryo nga pagbabag-o ngan andam nga maorganisa ngan mapagios.”★



PANHIIBATO...

## HA KAMATUURAN

### DIS-INPORMASYON HAN MILITARI

May bag-o nga kampanya han dis-inpormasyon an militari ha pamumuno han 8<sup>th</sup> IDPA. Iginpapasarang nira nga nagsasarang na ha rehiyon an Revolutionary Proletarian Army o RPA ngan Alex Boncayao Brigade o ABB ha ilarum han pamumuno ni De la Cruz ngan Tabara. Kasumpay hini, iginpasamwak han militari nga an gin-istraping nira nga mga tawo didto ha Barangay Talahiban, Oquendo District, Calbayog City, mga miembro kuno han RPA. Ngan bisan an pagkamatay ni Capt. Solima ginpasarang han militar nga an RPA an may responsabilidad.

May nakatago nga katuyuanan an militari ha luyo hini nga kampanya han dis-inpormasyon. Una siempre an makapagpasarang hin maitum nga propaganda kontra ha rebolusyonaryo nga kagiusan ha rehiyon. Kranyag nira magpasarang hin kasamukan ha ranggo han masa ngan bug-os nga rebolusyonaryo nga pwersa pinaagi han paglaladawan nga makusog na dinhi an RPA bisan kun waray kamatuuran. Samwak na ha ngatanan nga an RPA ngan ABB nga ginpapamunuan ni Dela Cruz ngan Tabara nagpaksyon nga mga rebisyunista ngan opurtunista nga traydor han kagiusan. May mga dagko hira nga kriminal nga kasal-anan ha rebolusyon ngan ginpaiwas na ha Partido. Diri bisan san-o hira kakarawton han masa ha rehiyon tungod han kontra-rebolusyonaryo nga kinaiya. An sugad ha ira waray lugar ha rebolusyonaryo nga kagusan dinhi ha rehiyon.

Ikaduha, karuyag han militar nga magkamayda hin bag-o nga poyde pagpasangilan han ira mga plano nga makapagpadako hin pwersa, modernisasyon ngan pag-aro hin mas dako nga badyet militar. Makaarawod mna kun an ipapasangil nira an NPA nga "maiha na nira nga nalipol". Tungod hini nga dis-inpormasyon, siempre, magpapadayon an ira buhay-buhay.

Ikatulo, diri na la an NPA an mahihimo nira gamiton nga pasasngilanan han ira mga kapalpakan han magmentinar han pase orden han rehiyon. Poyde liwat ini nga gamiton nga pasasngilanan han mga kriminal nga aktibidades han bugok nga militari ha rehiyon.★



### ABUSO HAN 34TH IBPA MAKARIMADIMA

An rekord han 34th IBPA ha ilarum han pagdudumara ni Col. Makalintal in masyado na hin makarimadima. Hini pa nga naglabay nga mga bulan otro na liwat nga naringgal an pagukoy nga pagpakabuhi han masa nga mga parag-uma ha kabaryuhan han Western Samar tungod han ira madarahug nga mga operasyon.

Yana pa la nga bulan han Hulyo, mayda na liwat hira ginronda nga balay han parag-uma, nagdakop hin masa nga waray sala ngan tubtob yana nawawara o missing.

Kon aton mahihinumduman, hadton naglabay nga Abril 10, 1997, suntok, banyak ngan bat istrok han sundalo an nahiaguman ni Nicanor Acebar usa nga baranggay kagawad han baryo Mahayag Matuginao W. Samar. An sundalo nga nagkastigo in kaapi han 34th IBPA ilarum han pagdudumara ni Lt Belona nga nakabase ha Gandara.. Nagkapipiangan an nasabi nga kagawad tungod han grabe nga kastigo dara la han pagdudahi nga may sumpay ha NPA.

Ha sinunod nga adlaw, pirit nga ginbariga hini manta nga yunit hi Entoy Rapesa, usa nga parag-uma nga taga baryo Diit Matuginao, W. Samar. Ginkastigo liwat hiya

han mga sundalo tungodn kay waray hiya uupod ha ira. Nagdependa an asawa ni Entoy pero ginsangalan hin buka han pusil an iya baba ni Lt. Belona agud mapamingaw. Nagpatakas liwat hin pagpinangawat hin manok ini nga nasabi nga yunit militar.

Hadton Mayo 1, 1997, waray liwat kaluoy nga ginpusil tubtob mamatay hi Ramon Manozo, usa liwat nga kagawad han baryo Canaponte, San Jose de Buan. An kriminal amo an mga kaapi han 34th IB PA nga nakadetats hini man ta nga bungto, ha pagdudumara ni Lt. Herdan. Klaro nga waray sala an biktima kundi ginkorsunadahan la han mga hubog nga sundalo.

Bisan an kanan 34th IBPA program ha Army Literacy Patrol System (ALPS) in puno hin panguwat ngan pangabuso. Naghahatag kuno hira hin serbisyo ha mga tawo pinaagi han paghahatag hin libre nga pagtutdo. Balitaw ha kamatuuran, ginsusuktan nira an kada na-enrol hin singkuenta pesos. Labot la, ginagamit nirta ini nga programa agud mangispiya ha aktibidades han masa ngan magpasarang hin maitum nga propaganda kontra ha rebolusyonaryo nga kagiusan.

Pero nagtitikang na pag-ato an masa nga mga parag-uma kontra han pangangabuso han 34th IBPA. Hadton naglabay nga Pebrero 15, nagkaurusa an mga molupyo han barangay Hibacaan, Hilomot, Hidoroma ngan Babaclayon nga sakop han San Jose de Buan pagprotesta ha porma han petisyon-delegasyon kontra ha pasista nga pangangabuso. Gintitipahan nira an pagkakampo han mga militar ha ira mga lugar ngan gimboksas nira an mga pangabuso pinaagi ha pagpapasamwak ha mga estasyon han radyo ha Calbayog, Catabalogan ngan Tacloban.

An an legal nga pakig-away han masa kontra han pangangabuso han militar nga kinahanglan maisugon ngan pursigido nga ilansar. Pero usa la ini nga porma ngan diri maunhan kun diri ikakaw-it ngan paseserbihon ha armado nga pakig-away. Aada pirmi an armado nga pakig-away nga amo an pinakaepektibo, lohikal ngan makatadungan nga opsyon han mga niraugdaug. Ha kamatuuran, an masa nga mga parag-uma in padayon nga nag-oorganisa ngan nagkokonsolida ha ira kalugaringon agud mas epektibo pa nga maisulong an ira mga pakig-away kontra ha pangangabuso militar. Pero ini nga paningkamot iginsusubay nira ha balayan han nasudnon demokratiko nga linya. tungod kay an kadaugan la han nasudnon demokratiko nga rebolusyon an ultimo nga solusyon ngan magtatapos han pasismo han reaksyunaryo nga gubyrno.. ★

## PITYUR



## Rebolusyonaryo nga Panan-aw ha Buruhaton Panlawas

Madinaugon an iginlansar nga medikal nga misyon ha usa nga prente han Samar hadton Pebrero. Nakahigayon ako nga magin kaparte hini rason nga karuyag ko magpasaro hin pira nga mga punto, kabahin han amon nagin eksperyensya ngan ha partikular ha pagpapasamwak ngan importansya han pagpapasamwak han tama nga linya han buruhaton panlawas.

An nagin katuyuanan han misyon amo an masunod: paghahatag serbisyo panlawas ha mga rebolsuyonaryo nga pwersa ngan masa, makapagpahara hin mga personahe para ha buruhaton panlawas, ngan integrasyon ha buruhaton ha kabaryuhan para ha mga kasama han misyon nga tikang ha syudad ngan iba pa nga busag-nga-dapit. Pankabug-osan nga balayan hini nga mga katuyuanan an pagtutul-id ngan pakigbisog ha burges nga mga konsepto ha buruhaton panlawas -- mga sayop nga konsepto nga daradara han mga pagsimang nga umatok ha mga kasama ngan ha bug-os nga rebolusyonaryo nga kagiusan.

Lakbitan naton kadali an pira nga punto mahitungod ha presente nga burges nga sistema ha serbisyo medikal pinaagi hin pira nga pakianan: Kay ano nga diri naabot han mga kabras an presyo han medisina? Kay ano nga waray naihahatag nga libre nga serbisyo panlawas ha kabaryuhan? Kay ano nga damo an diri natatambalan ngan namamatay nala ha mga ospital? Kay ano nga magkakaiba an pagtrato han mga kabras ngan riko ha mga ospital? Damo pa nga sugad hini nga pakiana ngan damo nga mga partikular nga hinungdan an poyde igrason. Pero ha kabug-osan, mauugat naton ini ha kadunotan han sistema, ha pagigin komersyalisado ngan nagseserbi la ha makaklase nga interes han mga naghahadi han sistema ha serbisyo medikal ngan buruhaton panlawas.

An komersyalisasyon ha oryentasyon ha serbisyo medikal han bagakolonyal ngan bagapyudal nga Pilipinas makikit-an dayon ha oryentasyon

*(Padayon ha sunod nga paypay)*

nga puros panresita hin mga bulong nga himo han mga langyaw nga mga kampanya hin medisina, ha serbisyo medikal han gubyrno ngan mga ospital nga puro kanan-Weste nga mga nasud an oryentasyon, ngan ha damo pa iba nga porma.

Ngan an sugad nga panhunahuna ngan oryentasyon namamahutpahot ha mga rebolsuonaryo nga pwera. Pira ka adlaw ha proseso han misyon, linutaw an problema ha ranggo han pira nga pasyente ha pag-iinsister nga matagan dayon hin medisina pagkatapos han tsek-up, o an panhunahuna nga katapos han tsek-up may madadara dayon nga medisina. Lutaw an pagtuo ngan pagin dependente han westehanon ngan burges nga konsepto.

Ha sugad nga problema, nagkaurosa an misyon nga pakusgon an pukaw nga pag-eksplikar ngan pag-edukar ha mga kasama ngan masa mahitungod ha tama ngan rebolusyonaryo nga pagtan-aw ha buruhaton panlawas. Samtang nagtse-tsek-up ngan nagtatambal dungan nga ginhihimo an edukasyon ngan mga paglilinawhan tama nga oryentasyon. An mga mayor nga punto nga ginhahatagan hin duon amo an: ***a) an importansya han tsek-up ngan an diri pangahulugan nga magtutumar dayon hin medisina; b) an importansya han paggamit han akupangtura kun diin ginlinaw nga ngatanan nga westehanon nga mdeisina may katugbang ha akupangtura; k) paggamit ngan pagpa-uswag han dihianon nga bulong (herbal) kun diin damo an aton rekursu; d) pagtutulitol han kasaysayan, hinungdan ngan an angay himuon kontra ha sakit; ngan e) an buruhaton panlawas komo kaparte han kagiusan panmasa.***

Komo pamaagi han padayon nga pag-edukar ngan paglilinaw ginpauswag an sistema han integrasyon ngan pagpapasaruyay. Salit ha proseso han misyon giutan han mga doktor ngan mga pasyente nagin marayhak an balyuay ngan integrasyon. Nakada an tsek-up, pagtambal, edukasyon, integrasyon ngan pasarusaruay.

Ha proseso han pasarusaruay, nadabihan naman an mahitungod ha propesyon han mga doktor. Sering nira an ira oryentasyon amo an pagtambal ha maysakit agud mabuhi an pasyente. Sumulod dayon ha akon paminsar nga karuyag sidngon ba hini nga nadiri hira ha armado nga pakig-away nga nagreresulta ha pinaptayay? Pero nasayuran manta ako dayon kay sering man hini nga kasama nga doktor nga “waray makatadungan ngan tinuod nga buruhaton ngan serbisyo panlawas nga mahitatabo ha ilarum han bagakolonyal ngan bagapyudal nga sistema. Karuyag namon nga an amon propesyon magamit para ha tinuod ngan makatadungan nga serbisyo ha katawhan. Mahitatabo la ini ha bag-o nga sistema, ha sosyalista nga katilingaban. Ngan ini nga katilingaban matutukod la pinaagi han armado nga rebolusyon.”

Ha parte naman han mga kasama dinhi, nagin marayhak an pagpapasaro mahitungod ha kagiusan pagtutul-id dinhi ha aton, ngan mahitungod ha mga partikular nga eksperyensya ha buruhaton masa.

Ha sugad nagin malinampuson an medikal misyon. Ha panambal, linahos ha upat ha pilo ha orihinal nga kadamuon han target nga mga pasyente. Labot la ha pisikal nga pananambal, naitul-id pa pinaagi hin edukasyon an mga sayop nga konsepto nga dara-dara han mga kasama ngan masa kasumpay han buruhaton panlawas. Nakab-ot an suok nga relasyon giutan han mga pwera tikang ha gawas, lakal ngan masa ug paprepareho ngatutuduay nakakuha hin mahinungdanon nga kahibaruan.

Sadang na nga naklasipikar naton an pagkakaiba han rebolusyonaryo ngan burges nga buruhaton panlawas. Nasubay han makaklase nga linya an aton buhaton panlawas, salit ini la an makakaghatag hin tinuod nga serbisyo ha katawhan. Labaw ha ngatan, magigin hul-os la ini nga serbisyo ngan makokompleto kun maigdaug an rebolusyon. ★

## LITERATURA ngan arte

(usa nga luwa)



## GWARDYA

*“Kasama, mata na, imo na an paggwardya!”  
Mahinay pero madig-on nga pulong han kasama  
nga nagpukaw ha akon.  
Dayon ko pagmata, pamuhaypuhay, pinakig-awayan  
an butong han hingaturugon.  
“Dali na, dagmita an paggios, bantaye an seguridad han mga kasama”,  
an sagda han akon proletaryo nga katindog.  
Dagmit ko nga ginsul-ot an katsutsera ngan ginsaklay an armas  
tikadto ha post.*

*Mataghum an kagab-ihon  
Pero ginpapaso an lawas ko  
han makaklase nga kangalas.  
Masirum an kagab-ihon pero masuna an mga mata  
nga matarum nga nanunutok, nag-oobserbar ngan alerto.  
An mga talinga pirmi nanmamati ha anuman nga aringasa,  
gin-aanalisar, ginkikilatis an anuman nga bation nga butang.  
An hunahuna pirmi nag-aaram han mga posibilidad ngan andam  
ha posible nga mahitabo.  
An armas pirmi andam. nga itutok ngan pabuthon  
ha kaaway nga masulong.*

*An segundo nagin minuto ngan an minuto nagin oras  
Natangpos na gihapon an akon kagwardyahan.  
An mga kasama maupay an katurug  
Kay waray distorbo gab-l nga mahimyang.  
Makalilipay paghunahunaon nga nakakagserbe  
ha pagpanalipod seguridad han mga kasama.  
Diri ba angay la nga hira panalipdan  
tungod kay ha rebolusyon hira kinahanglan?  
Bisan kon ha sakripisyo andam an ngatanan  
An diri kinahanglan nga sakripisyo angay ta likayan.*

*Alas dos na an oras hinin kaagahon  
Masunod nga gwardya akon na pupukawon:  
“Kasama, mata na, ikaw na an maggwardya!”*

